



Na osnovu člana 22 Statuta Brčko distrikta BiH („Službeni glasnik Brčko distrikta BiH“, broj 2/10 – prečišćeni tekst), člana 4 Zakona o prekršajima Brčko distrikta BiH („Službeni glasnik Brčko distrikta Bosne i Hercegovine“, brojevi: 24/07, 11/12, 06/12, 29/16 i 6/22), člana 64 Poslovnika o radu Skupštine Brčko distrikta BiH („Službeni glasnik Brčko distrikta BiH“, broj 54/18 – prečišćeni tekst i brojevi: 17/20 i 24/20) i Prijedloga odluke Vlade Brčko distrikta BiH, broj predmeta: 02-000118/23, broj akta: 01.11-0323SR-002/23 od 14. 7. 2023. godine, Skupština Brčko distrikta BiH, na 50. redovnoj sjednici održanoj 20. septembra 2023. godine, donosi

ODLUKU O NAČINU UPOTREBE LAKOG LIČNOG ELEKTRIČNOG VOZILA NA PODRUČJU BRČKO DISTRIKTA BOSNE I HERCEGOVINE

DIO PRVI – OPĆE ODREDBE

Član 1 (Predmet)

Ovom odlukom propisuje se način upotrebe lakog ličnog električnog vozila (u daljnjem tekstu: lako vozilo) na području Brčko distrikta Bosne i Hercegovine (u daljnjem tekstu: Distrikt).

Član 2 (Definicije)

Pojedini izrazi upotrijebljeni u ovoj odluci imaju sljedeća značenja:

- a) „lako lično električno vozilo“ je lično prevozno sredstvo bez sjedećeg mjesta, čija radna zapremina motora nije veća od 25 cm³ ili čija trajna snaga elektromotora nije jača od 0,6 kW i koje na ravnom putu ne može razviti brzinu veću od 25 km/h, odnosno čija najveća konstrukcijska brzina ne prelazi 25 km/h, kao što su: sredstvo koje se samo može uravnotežiti, monocikl s motornim ili električnim pogonom, romobil s motornim ili električnim pogonom i sl.;
- b) „motorno vozilo“ je vozilo koje se pokreće snagom vlastitog motora;
- c) „pješačka zona“ je uređena saobraćajna površina namijenjena za kretanje pješaka, u kojoj je dozvoljeno kretanje motornih vozila s posebnim odobrenjem;
- d) „trotoar“ je posebno uređena saobraćajna površina namijenjena za kretanje pješaka, koja nije u istom nivou s kolovozom puta, ili je od kolovoza odvojena na drugi način;
- e) „učesnik u saobraćaju“ je lice koje u saobraćaju na putu upravlja vozilom, ili se nalazi u vozilu ili na vozilu, koje tjera, vodi ili jaše životinju koja se kreće po putu, kao i pješak ili lice koje svoje poslove i radne zadatke obavlja na putu;
- f) „korisnik lakog ličnog električnog vozila“ je lice koje koristi lako lično električno vozilo;
- g) „vlasnik lakog ličnog električnog vozila“ je lice koje je vlasnik lakog ličnog električnog vozila.

DIO DRUGI – LAKA LIČNA ELEKTRIČNA VOZILA POGLAVLJE I. OPREMA VOZILA

Član 3 (Obavezna oprema)

Lako lično električno vozilo (u daljnjem tekstu: lako vozilo) obavezno je opremljeno:

- a) ograničivačem brzine kojim se osigurava da se ne prelazi maksimalna konstruktivna brzina, odnosno brzina do 25 km/h;
- b) prednjim i zadnjim katadiopterom;
- c) prednjim svjetlom za osvjetljavanje puta;
- d) uređajem za davanje zvučnih signala.

Član 4 **(Vozila koja nisu laka vozila)**

Lako vozilo nije:

- a) vozilo koje se smatra igračkom;
- b) vozilo bez sistema samobalansiranja sa sjedištem;
- c) vozilo namijenjeno takmičenju;
- d) bicikl potpomognut električnim pogonom;
- e) vozilo namijenjeno za upotrebu lica koja su pod medicinskom njegom;
- f) električno vozilo s maksimalnom brzinom preko 25 km/h;
- g) vozilo s nominalnim naponom većim od 100 VDC ili 240 VAC.

POGLAVLJE II. USLOVI I OBAVEZE

Član 5 **(Uslovi za upravljanje lakim vozilom)**

Lice koje upravlja lakim ličnim električnim vozilom (u daljnjem tekstu: lakim vozilom) mora da:

- a) ima više od 14 godina života;
- b) posjeduje potvrdu o poznavanju propisa o sigurnosti saobraćaja na putevima, koju izdaje Odjeljenje za obrazovanje Vlade Brčko distrikta Bosne i Hercegovine, u skladu s propisima koji uređuju oblast sigurnosti saobraćaja ili vozačku dozvolu kojom se dokazuje pravo upravljanja vozilom bilo koje kategorije;
- c) za vrijeme upravljanja lakim vozilom nosi na glavi zakopčanu zaštitnu kacigu.

Član 6 **(Obaveze lica kada upravlja lakim vozilom)**

- (1) Lice kada upravlja lakim vozilom ne smije da:
 - a) ispušta upravljač iz ruku, osim kada najavljuje promjenu smjera kretanja;
 - b) se pridržava za drugo vozilo;
 - c) vodi, vuče ili potiskuje druga vozila, predmete, ljude ili životinje;
 - d) dopusti da vozilo kojim upravlja bude vučeno ili potiskivano;
 - e) prevozi predmete, ljude i životinje;
 - f) upotrebljava na oba uha slušalice;
 - g) upotrebljava mobilni telefon;
 - h) bude pod uticajem alkohola ili opojnih sredstava;
 - i) u slučaju smanjene vidljivosti i od sumraka do svanuća koristi svjetloodbojni prsluk.
- (2) Kada se lice koje upravlja lakim vozilom kreće kolovozom, ono mora da se kreće veoma pažljivo i na način kojim ne ometa, ne ugrožava druge učesnike u saobraćaju ili ne sprečava saobraćaj vozila.
- (3) Lice koje upravlja lakim vozilom dužno je da upravlja takvim vozilom na način kojim se ne umanjuje stabilnost vozila i ne ometaju drugi učesnici u saobraćaju.

Član 7 **(Upravljanje lakim vozilom na trotoaru i kolovozu)**

- (1) Osim obaveza iz člana 6 ove odluke, lice koje upravlja lakim vozilom dužno je da:

- a) se na putu koji ima trotoar ili drugu površinu određenu za kretanje pješaka, odnosno površinu pored kolovoza pogodnu za kretanje pješaka, kreće po takvim površinama pod uslovom da je takvo kretanje brzine kretanja pješaka;
 - b) se na kolovozu kreće što bliže desnoj ivici kolovoza;
 - c) prije prelaska pješačkog prelaza, zaustavi lako vozilo i gura ga kao pješak, preko obilježenog pješačkog prelaza;
 - d) kada namjerava da pređe kolovoz na mjestu na kojem ne postoji obilježen pješački prelaz, ne stupi na kolovoz ako time ometa saobraćaj vozila;
 - e) se kreće samo po onim saobraćajnim površinama po kojima je dozvoljeno kretanje bicikla i mopeda.
- (2) Ako se dva ili više lica koja upravljaju lakim vozilom kreću u grupi, dužna su se kretati jedno iza drugoga.

POGLAVLJE III. ZABRANA UPOTREBE I EVIDENCIJA

Član 8

(Maloljetno lice koje upravlja lakim vozilom)

Ako maloljetno lice učini radnju koja je ovom odlukom propisana kao prekršaj, kaznit će se roditelj, usvojlac, odnosno staratelj maloljetnog lica novčanom kaznom propisanom za učinjeni prekršaj ako je taj prekršaj učinjen kao posljedica propusta dužnog staranja o maloljetnom licu.

Član 9

(Zabrana upotrebe)

- (1) Zabranjena je upotreba lakih vozila na mjestima na kojima je zabranjeno kretanje motornih vozila.
- (2) Vlada Brčko distrikta Bosne i Hercegovine može na prijedlog nadležnog organa javne uprave, dozvoliti upotrebu lakih vozila na pješačkoj zoni, uz obavezu postavljanja saobraćajne signalizacije na tim mjestima.

Član 10

(Evidencija vlasnika lakih vozila)

- (1) Odjeljenje za javni registar Vlade Brčko distrikta Bosne i Hercegovine vodi evidenciju o vlasnicima lakih vozila.
- (2) Evidencija iz stava 1 ovog člana sastoji se od:
 - a) ličnih podataka vlasnika lakog vozila;
 - b) podataka o tehničkim karakteristikama lakog vozila.
- (3) Na osnovu evidencije iz stava 1 ovog člana, vlasniku lakog vozila izdaje se uvjerenje.
- (4) Uvjerenje iz stava 3 ovog člana obavezno posjeduje lice koje upravlja lakim vozilom.
- (5) Uvjerenje iz ovog člana vlasnici lakog vozila dužni su pribaviti u roku od 30 dana od dana stupanja na snagu ove odluke.

POGLAVLJE IV. PREKRŠAJNE ODREDBE

Član 11

(Novčane kazne)

- (1) Novčanom kaznom od 40,00 KM kaznit će se za prekršaj fizičko lice koje upravlja lakim vozilom koje nema obaveznu opremu propisanu članom 3 ove odluke.
- (2) Novčanom kaznom od 60,00 KM kaznit će se za prekršaj fizičko lice koje upravlja lakim vozilom ako postupa suprotno članu 6 ove odluke.
- (3) Novčanom kaznom od 100,00 KM kaznit će se za prekršaj fizičko lice koje upravlja lakim vozilom ako:
 - a) postupa suprotno članu 5 ove odluke;
 - b) postupa suprotno članu 7 ove odluke;
 - c) postupa suprotno članu 9 stavu 1 ove odluke;

d) ne posjeduje uvjerenje iz člana 10 stava 4 ove odluke.

DIO TREĆI – ZAVRŠNE ODREDBE

Član 12

(Stupanje na snagu)

Ova odluka stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-5652/23

Brčko, 20. 9. 2023. godine

**PREDSJEDNIK
SKUPŠTINE BRČKO DISTRIKTA BiH
mr. sci. Siniša Milić**

Dostavljeno:

1. Predsjedniku
2. Potpredsjedniku
3. Gradonačelniku
4. Policiji Brčko distrikta BiH
5. Odjeljenju za javni registar
6. Odjeljenju za obrazovanje
7. Odjeljenju za javne poslove
8. Sektoru za opće i zajedničke poslove
9. Arhivi